

Regional News Unit AIR Aizawl
Saturday, June 15, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Mizorama Health Centre 331 Ni zung chakna hmanga an thawm that te chu Mizoram sorkar Health & Family Welfare Department kutah hlan a ni.
- Power Minister Pu F Rodinglana leh Assam Power Minister Pi Nandita Garlosa ten Power sector lamah Mizoram leh Assam bakah North East State dangte intelkhawma, thawhhona tha zawk neih dan turte an sawi dun.
- Sikkim Chief Minister Prem Singh Tamang chuan nimin khan an state chhunga ruahsur nasa avanga chhiatna thleng chungchang sawrkar mi paiwmawhte nen an ngaihtuah.
- Prime Minister Narendra Modia chuan nimin khan G7 Summit karlakah ram hrang hrang hruaitute a kawm.



HEALTH CENTRE SOLAR ENERGY

SELCO Foundation in Mizorama Health Centre 331 Ni zung chakna (Solar Energy) hmanga an thawm that te chu Mizoram sorkar Health & Family Welfare Department kutah hlan a ni.

Mizoram hmun kilkhawr a Health Centres te chu awmze nei leh mumal zawkin thawm that leh tih changtlun mek zel a ni a, SELCO Foundation te chuan Mizoram hmun kilkhawr a Health Facility 331 ah Solar Energy based system (Ni zung chakna hman theihna) a bun tawh a ni. Heng khawl te hi Health Department kutah a enkawl chhunzawm hna a pe fel tawh bawk a, a thawhkhatna atan Health Centres 438 zing a 331 chu he Ni zung chakna hmanga thawm that leh tih changtlun a ni tawh a, a bak zawng te chu a thawhnhina atan dah a ni.

He huna tarlan a nih dan chuan, he hmalakna hian Chatlak lo leh rintlak zawk a damlo enkawlna a puih mai bakah, Ni zung chakna hman hian state intodelhna leh sik leh sa inthlak avanga harsatna awm thei lakah kawng tam takin a veng thei a, vawiin thleng hian he thil avang hian Ni zung chakna 690 KWp zet deh chhuak tawh a ni

He inkhawmah hian Health Minister, Pi Lalrinpuui chuan ni zung chakna hmang a Health Facility thawm that hian Nau nei thei tur a hmathlir te, hridanna pek te leh Mizo mipuite tana atha ber min chhawpchuah sak thei dawn a, He thil hian Mizo mipuite ah nghawng tha tak a neih an beisei a, state dangte tan pawh he hmalakna hi entawn tlak tak a nih a beisei thu a sawi.



SPORTS CONCLAVE

Ni hnih chhung awh Mizoram Sports Conclave 2024 chu Baptist Centre, Falkland-a hlawhtling taka hman a nih hnuah nimin khan khar a ni a. Conclave chhung hian kum 2036 Olympic Games-a Mizo infiammi tam thei ang ber tel theihna'na ke pen dan tur thlirhona hun hman a ni.

He Conclave-ah hian Meghalaya Sports Minister Pu Shakliar Warjri leh Assam Sports Minister Pi Nandita Garlosa te lo kalin 2036 Olympic Games hmahlira nei chunga hmalak theihna kawng hrang hrang an sawi a. Anni bakah hian India rama infiamna lama sulhnu lian tak nei Reliance Foundation, Tata Trusts leh Jindal group atang te in an mithiamte leh mawhpurhna lian chelhtute an tel a. Services Sports Control Board hotu te, India rama sports federation leh association hrang hrang hruaitu te, Indian Olympic Association hruaitute bakah ram chhung leh pawn atangin sports journalist leh infiammi langsar tak tak te an rawn kal a ni.

Kan corr hnen atangin lo ngaithla ang.



TBC

Aizawl West I MLA, Pu TBC Lalvenchhunga, chuan ama bial puala siam mobile application, “Aizawl West One Online” tih chu nimin khan tlangzarh a ni a.

Tlangzarhtu Pu Vanneihtluanga chuan West I mipuiten tangkai taka an hman theih nan leh Mizoram puma midangte pawn an entawn ve a; Mizorama hetiang lam kawnga an harh chhuah theih nana hman anih a beisei thu a sawi. Pu TBC Lalvenchhunga chuan thu sawiin, an app siam chu thlan tlin anih hmaa alo tiam tawh anih thu te; ‘Langtlang Sawrkar’ an nih zia tilangtu anih thu te a sawi a ni.

He app ah hian Aizawl West I Constituency chhunga MLA Fund leh sawrkar department hrang hrang ten project an neih te, project man zat te, a thawktu leh Physical leh Financial Progress te thlengin tarlan a ni.



POWER MINISTER

Power & Electricity Minister Pu F Rodinglana chu Aizawla chenna inah Assam Power Minister Pi Nandita Garlosa nen an inkawm a. Power sector lamah Mizoram leh Assam bakah North East States dangte intelkhawma, thawhhona tha zawk neih dan turte an sawi dun a ni.

Pu F Rodinglana hian sorkar laipui Ministry of New & Renewable Energy hnuai Small Hydro Project Incentive Scheme, Central Ministry in State Sorkara tanpuina a pekchhuah thin ennawn tura dah mek chu rang taka Central Cabinet in a pawm theih nan bawhzui dan turte a sawipui a.

North East Regional Power Committee (NERPC) intawhkhawm leh hmasak ber ah he Small Hydro Project Incentive Scheme hi sawiho anih a, agenda a telh anih theih nan Chairman, NERPC a nihna anga hmalakpui tura sawmin, NERPC in Central Cabinet pawmpui tura chhawpchuah anih theih dan turte a sawipui nghal a ni. Pi Nadita Garlosa hian Mizoram Power Minister rawtna chu pawimawh a tih thu sawiin, hmalak ho zel anih tur thu a sawi ve bawh a ni.

Minister pahnihte hian North East State ten kawlphehtha siamchhuah kawngah theihnasang tak nei si in, a la hnufum hle a an hriat thu an sawi dun a, tanlak na tur hrang hrangte an sawidun bawh a ni.

Minister Pu F Rodinglana hian Assam Power Minister hnenah Mizoram in kawlphehtha siamchhuah kawnga a thlen chin leh hmachhawp awmte hrilhin, Indian Electricity Act hnuai a dan zam Renewable Purchase Obligation(RPO) pawh Mizoram in a la tihhlawhtlin theihloh avanga kum tin vaibelchhe tel Mizoram in a chawi thin thu hrilhin, he RPO hi Mizoram in a tlin ngei theihnan hydro power project lamah hmalak nasat a tum thu sawiin, hemi kawngah Central Ministry tanpuina tam thei ang ber Mizoram bakah North East States ten an dawn theihnan tangrual a tul thute a lo hrilh a ni.

<><><>

YMA DAY

Vawiin hian state pumah, tlawmngai pawl lian ber YMA Day vawi 89-na uar taka hman tum a ni a, tukin atang khan veng chhung tifaia hnatlang te kovin vawiin nilenga hun hman dan tur hrang hrang branch tin ten an ruat a ni.

Central YMA chuan he ni pual hian Damdawiin leh Home hrang hrangah chibai bukna an hlan kual tawh a.

Aizawl leh a chhehvelah Sawrkar leh Kohhran Damdawiin ah Rs.15,000/- theuh an hlan a, Home pathum ah buhfai an hlan bawh.

TBCC, Sakawtuichhunah Buhfai Bag 100 an pe a, TNT, Zuangtui ah hian Buhfai bag 50 pe in, OKM Home, Phunchawngah Buhfai bag 25 an pe a, Heng bakah hian ram chhunga state hrang hranga Mizo Welfare 16 hnenah Rs.15,000/- theuh an hlan bawh.

<><><>

HOME MINISTER

Home Minister Pu K.Sapdanga chuan Directorate of Forensic Science Laboratory, MINECO nimin khan a tlawh. a

FSL Conference Hall-ah FSL officer te nen inkawmin, hemi hnu hian Laboratory 8 leh a chhunga hnuchhuina khawl leh hmanraw pawimawh te a endik nghal a ni.

Home Minister chuan hmasawna in a rawn ken tel tak avangin pawikhhawihna leh misual hnuchhui te a hautak sawt a. Science thiamna hmanga uluk taka chhui a ngaih tak zel avangin Forensic Laboratory pawimawhna hi a pun belh zel a. Thawktute tam lovin, indaihloh hle mahse India ramah misual hnuchhui kawngah Mizoram Forensic Science Laboratory te an hming tha hle a, an chhuanlam takzet a ni a ti.

Home Minister chuan Directorate of FSL te mamawh te chu a hriat thu leh hun remchang hmasaah thawm changtlun dan tur te pawh ngaihtuah a ni ang a ti a. Tun dinhmunah erawh, thawktute chu an indaihlohna ngaihtuah lovin an pawimawhna hrechiangin theihtawp chhuah zel turin a fuih a ni.

FSL officer leh staff te chu misual hnuchhui kawngah an pawimawh tluk zetin mi pawisawilo case nei te chhuah zalenna atan hna pawimawh tak an thawk tih a sawi a. Hei vang hian, pawikhawihna leh misual hnuchhui kawngah Forensic leh Cyber Crime lam tihchangtlun hi a tul a, police te tha tichak leh zual tura thil pawimawh ber pawl a ni mek thu a sawi a ni.

NDPS Act of 1985 hnuuia Notification that berin a phut angin FSL a sample thehluh hi ni 30 chhungin endik a, result siamchhuah hman tur a ni a. FSL thawktute chuan case a tam avangin officer leh staff tlem tein rim takin an thawk a, indaihloh a karah pawh state dang ten kum 10 aia tam te case tam tak an dah tawl laiin Mizoramah chuan case pakhatmah pending a awm lo an ti a. India ramah FSL Mizoram chiah hi zero case pendency la thei an nih thu an tarlang bawk.

<><><>

SIKKIM RAIN HAVOC

Sikkim Chief Minister Prem Singh Tamang chuan nimin khan an state chhunga ruahsur nasa avanga chhiatna thleng chungchang Mintokgang Gangtokah sawrkar mi paiwmawhte nen an ngaihtuah a. Bungrua a tihchhiat te, inkalpawhna kawngpui chhiate, power chhia, ei leh in leh mobile network lama harsatna te an sawiho a ni.

Chief Minister chuan chhawmdawl hna ngawrh taka thawk chhunzawm tur leh chhiatna thlen zualna lai te ngai pawimawh turin a chah a. Mipuite chu inralring renga awm tur leh himna tura inkaihhruainate ngai pawimawh a, sawrkar thuneitute thawhpui tha turin a chah bawk a ni.

Puan tawh angina darkar 60 kalta chhunga ruahsur nasa avangin Sikkim-ah hian chhiatna a tam tak a thleng a. Khualzin tourist 2000 chuang an tangkhang mek a. State chhung hmarlamah chhiatna a thleng nasa zuala a. Teesta River chim chin a san zel avangin lei hlui a chim a, hei bakah hian Sanklang-a baily bridge thar a chhe bawk. Hei vang hian North Sikkim-a Dzongu region kalpawhna a chhia a, mi 2000 chuang an tangkhang nia thudawn a ni.

Chhiatna thlengah hian Mi parukin an thih phah thu tarlan niin pathum hi Pakeshep ami niin pathum dang hi Ambithang ami an ni a. Ambithang leh Kabi ah hian chhiatna thleng avanga hliam tuar an awm bawk a ni. Hei bakah hian Namchi leh Gangtok district ah chuan inkalpawhna kawngpui tam tak tuiin a chim chhia a ni.

<><><>

PM @ G7

Prime Minister Narendra Modia chuan nimin khan G7 Summit karlakah ram hrang hrang hruaitute a kawm. Pu Modia chuan French President Emmanuel Macron kawmin ram pahnihten thawhdunna an neihna hrang hrang defence, nuclear, space, zrina,, sik leh sa siamthat, digital public infrastructure, technology, inbiakpawhna leh mipui mimir khawsakna lamte an sawidun a. Khawvel thilthleng pawimawh te an sawi dun bawk a ni.

Prime Minister Modia hian UK PM Rishi Sunaka pawh biain India-UK Comprehensive Strategic Partnership ti nghet zel tura NDA sawrkar term thumnaa hma alak tur thu a sawi a. Semiconductor, technology leh sumdawna lama inthlunzawmna thuk zawk neih zel a duh thu a sawi bawk a ni.

Nimin vek khan Pu Modia hian Ukrainian President Volodymyr Zelenskyy a kawm bawk a. Ukraine buaina tawh mek thlir chungin ram pahnih inkara inkungkaihate an sawidun a. India chuan buaina chingfel turin inbiakna dawhkana thil sawiho chu a thlawp reng tih a sawi bawk a ni.

Puan tawh angina G7 Summit hi Italy a Apulia khuaah ni hnih chung neih a ni a. Prime Minister pawh sawm anih angina a tel ve a, Outreach Programme ah telin khawvel chhim lam ram Global South te ngaih pawimawh a tul zia uar takin a sawi a. India-in G20 President chanvo a chelh laia African Union-te member atana lakluh an ni chu chhuanawm a tih thu a sawi bawk a ni.

Tun tum hi a term thumna atana Prime Minister anih leh hnua Prime Minister Modi-an ram pawn a tlawh hmasak ber a ni.

<><><>